

衛藏通志
五



衛藏通志

(五)

撰人未詳

衛藏通志卷十三中

紀略中 原目作方略

兵部侍郎和琳、副都統銜鄂輝、四川總督惠齡分段督催轉運糧餉。

閏四月初七十六等日奉上的諭。現因西藏辦理軍務一切糧運烏拉關係緊要。且當諸務廢弛之後。亟資整頓。是以特派和琳前往督理。但大臣中如和琳細心曉事者。即不可多得。將來事定後。派往駐藏大臣。不過於副都統等員內酌選安靜者派往。烏能盡係曉事之人。即同在一處辦事。尙恐不得主見。若分駐前後藏兩處。勢必不相上下。或至爭競。甚至遇事互相推諉。轉於公事無益。現當軍興之際。前後藏派令鄂輝往來巡查。原爲目下一事。將來大功告成。後藏地方並無須撥兵戍守。一切藏務俱在前藏經理。其後藏祇保班禪額爾德尼梵修之所。又安用分員駐守乎。總之此時惟在福康安等酌籌進勦機宜。一俟大兵齊集。先將濟噶賊匪勦盡。期攻播陽布。掃穴擒渠。爲一勞永逸之舉。計其善後事宜。均可緩爲酌議也。欽此。又奉上諭。所有濟噶以內糧運烏拉等事。節經降旨。令和琳在藏督辦。鄂輝往來接轡催查。但伊二人所辦。同係一事。斷不可稍分畛域。致滋推諉。務須互相商酌。彼此關照。兩人共事。如同一人。若和琳在藏駐劄時。鄂輝即至沿途催查。俟運如鄂輝回至前藏時。和琳即赴後藏。至濟噶一帶督率催查。總期軍糧轉運迅速無悞。至濟噶以外。鞭長莫及。非二人經理所能周到。今思惠齡本係參贊大臣。又係本省總督。一切呼應較靈。所有濟噶以外。及大兵所到地方。需用軍糧。寬著惠齡專辦。不必同福康安帶兵前進。將來大功告竣。惠齡轉輸之功。即與戰勝之功無異。朕必與福康安、海蘭察一體加恩。並不因伊未曾督戰。稍存歧視。惟自濟噶以外。糧運設有缺誤。則惟惠齡是問。欽此。

兵部侍郎和琳具奏爲籌辦運送軍火錢糧酌定期限催償章程以期迅速事竊臣於初四日出打箭爐十五日至巴塘西之竹巴龍地方由福康安報便寄到奉上諭據福康安籌辦前藏以東台站烏拉各摺所辦俱妥已於摺內詳悉批示矣糧運爲軍行首務台站烏拉最關緊要經福康安與達賴喇嘛濟喃呼圖克圖等札商使各站俱有受僱牛隻照例給價到站即行可期無誤但必須統理得人應付更爲妥協前已有旨令惠齡領兵勦賊不必再回前藏其一切藏務令和琳妥爲經理和琳此次馳驛赴藏行走迅速約計閱四月內可以抵藏所有此項台站烏拉等事著交和琳督率統理可期得力欽此臣出口後留心稽查見牛馬馱載人夫背運者不絕於道一面催令趕緊行走並接見護送員弁及台站糧員問以牛馬人夫背馱輕重每日行程若干如何更換烏拉不致耽擱之處據稱牛馬皆係各土司營官備辦照例給價自去秋至今來往日久間有死傷率多疲乏故亦間用人夫背運每二人抵牛馬一匹經孫署督設法籌備不時委員查催現有委員皆係奉文添派計人夫日行二三十里不等牛馬日行四五十里不等每起軍需到台須得等候齊集方可發給烏拉各等語查自打箭爐至前藏五千三百餘里似此行走勢得四月有餘方能抵藏現在福康安正領兵深入剋期擒賊之時雖藏內現有火藥鉛彈已運後藏尙不致有缺乏但軍火錢糧寧可有餘斷不容稍有不足今復奉恩旨前藏以東台站烏拉交臣督率經理今查自藏界南墩以西經福康安與達賴喇嘛札商作爲五十四站每站添牛三百隻受僱照例給與價值自可較前加快然以臣耳目所及現在情形若牛馬僅行四五十里即每站再有三三百隻亦不能期其迅速莫若立定期限申明賞罰不特護解員弁不能任意行惡藉端卸過而臣等亦得有所查考查口外山路陡險風雪不時側徑偏橋怪石林立迴非同棧道入夜亦可慣行臣悉心籌計果如烏拉不誤催償得力均折道途難易一日亦可限行八九十里牛馬既速於人夫事體亦歸於畫一今酌中定擬險阻之區每日限行八十里漫坡之路每日限行九十里凡一起軍需到站不必俟其齊集各台員立即分派烏拉武職撥兵護送隨到隨行下站查明時日折算限期如其有認真出力於限內趕多程途者抑其有催償不力違逾限期者俱責令總理台站道員等據實查明申報臣等分別獎賞枷責設各台員辦給烏拉通融僱用人夫解員能於驅使亦照牛馬限期當所不禁或竟有違限過多經臣等查出除徵末員弁從嚴究辦外其沿途總理道府副參遊擊等員亦應一併

嚴參治罪。俾各自顧考成。知所奮勉。庶於軍行要務。大有裨益。本日接據巴塘稟報。有運送火藥鉛丸弓箭三起。委員到站。皆係人夫背運。尙未到齊等語。臣因立法之初。即此可以試驗。必得親身經理。竹巴籠距巴塘九十餘里。當即馳回。率領台員將備。將現有牛隻驢馬儘先到者。分載催行。嚴諭委員。務須按限行走。並飛飭前途合站。一體遵照辦理。臣隨路查察。自可驗其勤惰。因見巴塘土司吹忠札布。告以西藏所屬喇嘛第巴等。現在添辦牛隻之事。該土司自稱久受國恩。常思報效。懇請多方搜覓。亦照西藏所屬除現備烏拉之外。情願添備三百隻。伺候受偏等語。臣遂面加獎勵。從優賞資。一面將賞罰章程。札商孫士毅斟酌損益。再當頒行各站等因。

協辦大學士署四川總督孫士毅馳赴察木多督辦運送糧餉

閏四月十七日。奉上諭。孫士毅奏。打箭爐至前藏道里遙遠。軍備等項。未能剋期迅速。現在帶領幹員。親赴察木多駐劄督辦等語。所辦甚好。此時福康安等正在集兵進勦。糧運軍儲。最爲喫緊。正爲此繫念。今孫士毅移駐察木多。親身督辦。呼應既靈。而承辦之員。亦可隨時稟商。聽候調度。一切糧餉等項。更可迅速慣行。事事應手。孫士毅不辭勞瘁。實心經理。殊屬可嘉。著仍賞戴雙眼花翎。並賞大荷包一對。小荷包四個。隨報發去。以示優眷。口外地方烏拉等項。俱係各該土司出派受偏。非內地民夫可比。若過於嚴緊。或致躲避不前。轉有遲誤。務在寬猛得宜。善爲招集。想孫士毅自能辦理協宜。俾土民等聞風爭赴。踴躍趨事也。至軍行需用糧餉等項。由川省至察木多。有孫士毅在彼督辦。自可不致遲誤。其自察木多以西。由前藏至濟甯以內地方。昨已有旨令鄂輝和琳。無分畛域。輪往照料。今孫士毅駐劄察木多。相去較近。一切更可知會商辦。其濟甯以外。及大兵勦賊所到地方。糧運尤關緊要。亦已有旨令惠齡專在彼督辦。軍營糧食。自可無虞短缺也。又據孫士毅奏。道員王啓焜自調赴打箭爐。代辦出口事宜。均屬周到。請將該道留駐打箭爐。責成經理等語。王啓焜經孫士毅委辦出口各事務。甚爲出力。自應留駐打箭爐。俾資照料。並著加恩賞戴花翎。用示鼓勵。其先派往之道員林儒。及另片所奏道員徐長發。經孫士毅派在口外總理台站。該員是否實能出力。著孫士毅察看。如果

辦事奮勉。即傳旨一體賞戴花翎。俾益加感勵。若不過尋常辦事。即毋庸賞給。欽此。

兵部侍郎和琳四月十三日抵前藏。

閏四月十三日。具奏。御賜達賴喇嘛。班禪額爾德尼哈達。手串。鈴杵。噶布。鼓。大小荷包等物。一一賞給。感謝天恩等因。奉硃批。欣慰。覽之。欽此。同日。具奏。查辦丹達以西各台站運送軍需情形。由丹達至拉里沿途察看。軍火各起。雖尙間有大窩。甲貢邊壩等處擁擠未前者。因此數處大山重疊。風雪不時。各站派安牛隻。亦多不能齊備。即有已經安設之處。查點每多疲乏。臣亦一體將已設者重加賞資。未設者勒以限期。並委員逐段迎催。將停積軍火等項。先行加價僱覓烏拉。一併起運在途。均已進行無滯。臣復於江達地方。見前藏派出之喇嘛噶布倫噶勒桑那木札勒在彼催辦牛隻。已將江達應安站牛。全數安足。臣諭知爾係噶布倫。凡達賴喇嘛所管地方。皆係爾所應管。因何大窩邊壩一帶派安牛隻。至今並未添齊。據該噶布倫回報。我原奉達賴喇嘛分付。自前藏起。凡係該管地方。均應逐站催辦。今江達已經安妥。即欲趕赴前途。一律安設。臣查看其人甚覺明白懂事。迥非一路所見營官頭人糊塗疲玩者可比。臣當將大窩邊壩等處烏拉未齊。以致軍需停積。爾不能辭咎之處相諭。又用好言勉勵。優加獎賞。並諭知大皇帝保護黃教。恩卹番衆之聖心。即如運送軍需。各站僱用烏拉。各給腳價。此次大將軍福康安飭令每站添牛三百隻。亦俱按站發價。並無苦累番民。爾須親往料理。勸諭僧俗番衆。踴躍辦公。毋得稍存推諉。致干重咎。該噶布倫既知感激。亦甚畏懼。臣隨將江達至南墩一路安設站牛。價運軍火等事。均面交該噶布倫一人專管。令其隨時稟報。遇有出力者。即從優給賞。怠玩者。即分別懲創。該噶布倫頗知領會。隨遵奉而去。臣又恐各處商卓特巴營官等不能一律遵行。到藏後。與濟隆呼圖克圖相見。臣見其人品端方。安詳體面。並訪其在藏辦事最爲公正。番情亦皆悅服。當即向其常談。告以爾係大皇帝特派來藏辦事之人。近復蒙恩加封前輩慈通禪師名號。尤當加倍出力。仰報天恩。該呼圖克圖合掌頂禮。感激歡忭之情。形於顏色。自稱小僧得蒙皇上如此優恩。實出

望外。敢不竭盡愚誠。凡事與大人審商。遵奉辦理。以期無負高厚等語。臣隨即與之商酌。繕發漢番字傳牌一張。將臣前次奏定限期賞罰章程。明白開載。一禮傳知東路商卓特巴濟仲。及營官第巴等。務須遵照辦理。並聽從噶布倫噶勒桑那木札勒指示。將站牛如數安足。另於額外多辦烏拉到站。以資運送軍火等項。庶可於迅速之中。倍加迅速。至臣先在乍了阿足。見該處商卓特巴辦理安設站牛。諸事疲玩。不遵約束。當即寄信達賴喇嘛。及濟噶呼圖克圖。酌量更換。今觀面與濟噶呼圖克圖商定。派委妥幹喇嘛二人前往查明。如果乍了阿足兩處烏拉已經如數安齊。尚可將功折過。若仍未足數。即令此次派去之喇嘛。在彼接管代辦。一面將遲誤之商卓特巴解至前藏。酌量治以應得之罪。查現在福康安業已統領大兵自後藏進發。臣與鄂輝會飭西藏糧務。將烏拉寬爲預備。俟上站軍需各項運到。即可源源接濟。趕赴軍營。其自前藏以西。現經鄂輝亦查明程站。定立限期。一體照辦。是東西各台站經此一番整飭之後。自可一律疏通。斷不致再有停擱。臣自過丹達後。續過魯貢拉。阿南多。搭竹卡拉里。鹿馬嶺等山。雖間有冰雪未化。仰賴聖主洪福。並無阻滯。於閏四月十三日到藏。所有臣到藏日期。及查辦各台站情形。理合恭摺具奏。等因。奉硃批。一切留心。可嘉。至。朕自喜用汝之當。益當勉力。欽此。

閏四月二十七日。大將軍公福康安自第哩浪古

即定

進兵。徑趨宗喀。

駐藏大臣兵部侍郎和琳。副都統銜鄂輝。催查東西各台站運送軍火。併添夫價運糧石。

閏四月二十七日。和琳鄂輝等具奏。臣和琳到藏後。半月以來。統計陸續到藏者。火藥重五千三百餘觔。大小鉛子四萬六千六百餘顆。火繩四百六十觔。勁弓五百張。箭三萬枝。餉銀二起。共十五萬兩。又軍裝勒鞋二千雙。均經臣和琳在途派留弁兵勒限押送前來。俱能如期而至。當將解弁營官等分別獎賞。以示鼓勵。後起各項。相離亦不甚遠。解員等自必聞風各知奮勉。臣等早飭西藏糧員預備烏拉牛隻。每遇運到一起。隨即發給駄運。並另派弁目押送。立時起行。自前藏以至軍營。臣鄂輝亦俱勒定程限。現赴後

藏一帶。親爲督催。更可隨處查明行走遲速。以定勸懲。伏查自軍興以來。東路各台烏拉應付不齊。每致軍需遲滯。先經大將軍公福康安派委甘肅布政司景安。在察木多等處往來查辦。又復專派游擊雷仁。楊宗澤等員分段督催。臣和琳經過時。隨從僅有家人數名。原本乏員差遣。當即督催相機布置。即將程限賞罰章程。而飭遵辦。並囑令善爲駕馭。不激不隨。該員等俱能體會而行。認真催價。毫無停積。是立限之一法。行之已有成效。至前藏現有松茂道倭什布駐劄總理一切。更可隨時面爲指示。飭令妥速辦理。查各台運送藥彈。弓箭。餉鞘。軍裝等項。臣和琳經過後。截至閏四月初十日止。計已過察木多者十七起。過恩達者十一起。過拉里者八起。抵前藏者六起。又據各台員稟稱。站牛陸續添安。間有未經足額者。不過數日。均可到齊。似此層層稽查。站牛又復一律安備。銜尾續行。斷不致再有遲誤。至前藏探辦糧石。臣和琳亦曾詢之濟甯呼圖克圖等。據稱實有十二萬六千八百餘石。均係分派番民寨落。隨時炒磨。於附近糧台交納滾運。日來官兵雲集。所需口糧甚多。先經臣鄂輝與達賴喇嘛商酌。嚴飭辦理。糧石濟仲喇嘛。第巴頭人。務于本月內全數磨出。交與站員滾運。趕赴軍營。蓋糧不難於採買。而難於輸運。查濟甯。莽拉木等處進兵之路。山程險隘。牛馬多不能行。早經飭令前後藏預派人夫一萬名。在拉孜。定日兩處伺候。大兵前進。隨往大營。一俟官兵深入。凡係糧石軍火。均可用夫背運。臣鄂輝現飭後藏總理道員承勳。隨營道員林鶴。計算官兵數目。務將糧石隨營轉運。除各兵每月每人支領若干。尙須更有贏餘。方可有備無患。現在後藏牛隻雖易染患瘟疫。先經大將軍公福康安商之達賴喇嘛。專派噶布倫多爾濟策楞攜帶銀兩。凡有倒斃牛隻。即行如數買補足額。昨又札會臣鄂輝。飭令添派站夫運送。臣即與濟甯呼圖克圖商酌。又於各糧台附近地方。每處酌量添僱番夫二三百名。以資背送。在人運原不及牛運之多。但牛易疲斃。而人可長行。且定例二牛須用一夫。即以牛價給發夫價。亦各相等。實於糧運有裨。臣和琳目擊東路情形。如瓦合。丹達。魯賈拉。拉里。瓦子諸山。陡峻險阻。山中無草。牛力往返數次。每多疲乏。茲與達賴喇嘛。濟甯呼圖克圖商酌。亦照後藏之例。於此數站酌設人夫二三百名。以濟牛力之不足。今臣二人相處業有旬餘。無論前後藏台站輓運等事。均各和衷商同辦理。所有藏中應辦一切事宜。亦必悉心講求。臣和琳俱各得頭緒。臣鄂輝拜摺後。即於二十八日起程。遵旨前往後藏。直至軍營。接轡往來。督催糧運。烏拉並經理後路卡隘策應等因。奉硃批。覽

奏欣慰更當
勉力欽此

五月初六日大將軍公福康安攻克擦木進勦濟喇

大將軍統師至擦木地方。即乘雨夜發兵。分爲五隊。福康安帶兵由正路往來截殺。指示攻勦。將賊匪調座立時攻克。殺死賊首三名。賊匪九十餘名。擊獲活賊十八名。乘勝直前。進勦濟喇等因具奏。奉上諭。廓爾喀賊匪在擦木地方。憑據險要。抵死拒守。福康安悉心調度。督率將弁兵丁。分隊堵截。即乘雨夜進兵。將土人用命奮勇爭先。險溪涉水。攀援而上。奪獲賊礮全。殲賊衆。實爲奮勉出力。勤勞倍至。深堪嘉獎。福康安著賞御用搬指一箇。大荷包一對。小荷包四箇。海蘭察、惠齡著各賞玉搬指一箇。大荷包一對。小荷包二箇。用昭優眷。其帶兵之哲森保、翁果爾海、墨爾根、阿哈保、阿滿泰、額勒登保、珠爾杭阿、安祿、桑吉斯塔爾、台斐英、阿、陳能泰、張之元著各賞大荷包一對。小荷包二對。並發去奶餅一匣。令侍衛章京一體分賞。均沾實惠。所有打仗兵丁俱著賞給一月錢糧。此。欽

五月大將軍公福康安參贊大臣海蘭察惠齡等攻戰於擦木幫杏克復濟喇

五月十一日具奏。臣等初次在擦木地方與賊攻戰。因巴圖魯侍衛官兵俱屬同力奮勇。將賊番爾卡即經攻克。不致賊匪一名竄逃。旋至那噶爾轄爾甲。賊衆由薄林內衝出。因巴圖魯等俱經備齊。即率索倫官兵敵戰擊賊。乘其敗遁。在馬上施放鎗箭。殺死賊二百餘名。其餘二十餘名賊番。入於占據濟喇山寨。方行撤回札營。於初十日攻圍濟喇山寨。而巴圖魯等分路帶兵攻取各處礮卡。毫不留力。一日半夜奮勇即將濟喇山寨攻克。當經臣等查其勞績。謹將皇上御賜奶餅分給巴圖魯等。傳諭恩旨時。所有巴圖

魯等感戴殊榮深恩更加歡忭將由山桑逃出賊匪追擊復又殺死許多賊人生擒數名伊等實屬奮勉竊思臣等守候調來之兵未能及早進剿今仰賴皇上威福始將濟噶恢復雖屬不堪保舉伊等但巴圖魯官兵等由西寧打箭鏢迅速前來因路遙遠馬匹疲乏徑然步行者居多今遇此機會並未歇息即行三次奮勇將賊痛加殲戮理合乘公陳奏等因奉上諭福康安等奏恢復濟噶等處地方請將奮勉官兵人等施恩獎勵等語此次在擦木攻戰賊卡並將那噶爾轄爾甲前來賊番掩襲追殺恢復濟噶地方所有巴圖魯侍衛官兵奮勉爭戰殊屬可嘉似此出力人員理宜施恩合獎英阿著賞給散秩大臣阿滿泰遇有副都統缺出即行坐補至定西露因前次攻戰得受餘傷已賞給二等侍衛矣桑吉斯塔爾其屬奮勉又經受傷著賞給雜勒丹巴圖魯名號授爲二等侍衛吹札布賞給捧僧額巴圖魯名號三等侍衛索多爾海賞給尼經額巴圖魯名號呼倫貝爾副總尉巴濟達爾賞給賜濟爾渾巴圖魯名號三等侍衛達郎阿賞給喀勒崇義巴圖魯名號布達海佐領獎賞花翎色爾滾賞給托磨洪武巴圖魯名號呼倫貝爾獎賞花翎拜薩爾圖賞給色勒巴圖魯名號屯練遊擊郎爾結賞給喀達巴巴圖魯名號屯練都司斯丹巴索囉克多爾巴圖魯名號屯練都司阿甲賞給吉約克博巴圖魯名號屯練守備德相普木賞給諾木巴巴圖魯名號巴旺大頭人阿達賞給塔布愷巴圖魯名號仍照例每人各賞給銀一百兩頭等侍衛獎賞花翎能登額巴圖魯圖木勒塔授爲額外總尉齊齊哈爾佐領雙甯呼倫貝爾佐領兼騎都尉訥色勒圖呼倫貝爾總尉兼佐領雙騎尉多爾濟布特海驍騎校兼雲騎尉英喀布呼倫貝爾雲騎尉札丹保甘肅副將達晉太屯練守備阿拉屯練千總僧格土司千總巴古莽塔爾屯練守備阿塔爾土司都司班達爾甲屯練守備阿納錫勒革布什咱大頭人索諾木端珠布俱著賞戴花翎布特海領新保甲兵錫勒勒罕額楞車布勒特衣呼倫貝爾甲兵札達露四川千總唐忠榮屯練遊擊策旺屯練都司任泰結班達爾結別魯西貢革布什咱小頭人安吉布特海領催高屯練廷甲兵德勒根車額爾古車五圖保呼倫貝爾領催德勒格爾甲兵福明阿法盆察四川千總賀瓜隆屯練守備勒西爾甲伍木布阿西貢屯練千總依什賚土司把總策旺普木布特海領催呼舒泰甲兵成泰哲勒格訥依布特海餘丁穆喀勒岱呼倫貝爾甲兵噶他蘇色楞四川額外把總劉成金屯練守備申濟土司守備章布木阿雜拉屯練千總根登塔木屯練額外把總阿布木俱著賞戴藍翎屯練遊擊職

衛穆坦阿忠、降香遊擊職銜色木裏雍忠賞給副將職銜、乾清門一等侍衛珠爾杭阿、二等侍衛翁果爾海補授頭等侍衛、三等侍衛克星額三等侍衛阿那保補授二等侍衛、藍翎侍衛鄂尼保、福哈傳、陸鳴、爾岱、雲騎尉阿岱、伍勒哈、訖薩木布、戴補授三等侍衛、鄂倫親軍洛木博春、噶喇保、斌誤、新親軍委署前鋒校巴彥察、親軍特克訥衣、鄂爾德、江定、前鋒福永、閑散哲克授爲藍翎侍衛、呼倫貝爾驍騎校委署參領特克慎、巴圖魯博多果爾授爲額外佐領、呼倫貝爾領催定巴魯、布特海領催博勒亨保、布特海餘丁哈達爾、呼倫貝爾甲兵依勒噶察克什克爾薩爾授爲額外驍騎校、此次攻戰濟甯兵丁、獎賞一月錢糧、以示獎勵、欽此。

十二日、領隊大臣成德、岱森保由聶拉木一路占據德沁鼎山梁、攻克頭卡、二卡、三卡。

大將軍福康安派副都統成德、岱森保等、在聶拉木一路牽綴賊勢、令其酌量進攻、即於十二日分路前進、占德沁鼎山梁、攻克頭卡、鎗斃賊匪多人、將二卡三卡俱行攻克、焚毀木棚、搭橋前進等、因具奏、奉上諭、交福康安查明打仗出力者、奏明酌加獎賞、以示鼓勵、欽此。

十五日、大將軍福康安等攻克熱索橋。

大將軍進攻熱索橋、緣該處爲賊扼要之地、賊跨河浮搭木板、並於南北兩岸砌築石卡、據險抵禦、經官兵直前攻撲、賊匪拆去木板、放鎗抗拒、大將軍令暫撤各兵、於十五日密遣阿滿泰等帶領屯土兵丁、由峨綠大山繞至上流、紮筏潛沿河疾行、直撲賊卡、殺死賊匪數十人、推倒頭層石卡、所有正路官兵、乘搭橋一時並濟、復將後層石卡奪據、賊匪惶惶奔竄、自相踐踏、官兵直追至賊境、色達木地方、沿途痛勦賊衆、擒獲活賊八名等、因具奏、奉上諭、福康安等奏攻克熱索橋、追臨賊境、覽奏欣慰、濟甯以外高山夾

時窄徑崎嶇。較之金川尤爲險阻。賊匪恃險據守。放鎗抵禦。福康安抵熱索橋時。因與賊相持。急切不能得手。隨暫撤各兵。繞越兩重大山。在熱索橋上流潛渡。乘其不備。直前攻撲。痛殲賊匪。奪據石卡。所辦深合機宜。可嘉之至。該處爲賊匪門戶。今已乘勢攻克。統兵深入。勢如破竹。自早直趨陽布。追搗賊巢。捷音當已在途。著賞給福康安、洋珠、三錢表一箇、御用大荷包一對、小荷包四箇、海墘、察洋珠、三錢表一箇、大荷包一對、小荷包二箇、惠齡、洋珠、二錢表一箇、大荷包一對、小荷包二箇、用昭優眷。並發去翎管十箇、大小荷包各十對。交與福康安等查明。遇有帶兵出力之侍衛、章京、將領等。酌量賞給。所有此次帶兵繞道渡河。殺賊之巴圖魯、侍衛等。實屬奮勇出力。除阿滿泰已於上次打仗得勝。加恩以副都統即補外。前陞頭等侍衛之翁果爾海、顯等。侍衛哲森保俱著賞給副都統職銜。墨爾根保著陞爲二等侍衛。兵丁等亦著查明共有幾人。一體加賞。以示獎勵。其攀援獨木偏橋前進之兵丁。如有跌斃者。亦著查明咨部。照陣亡例議卹。欽此。

戶部奏撥餉銀三百萬兩解赴川省

五月初四日。戶部議奏。爲欽奉上諭。此次大兵進剿廓爾喀。節經降旨撥銀三百萬兩解往川省。以備軍需。恐不敷應用。著戶部於附近四川省分。再酌撥銀二百三十萬兩。解交川省。交署督孫士毅備用等因。欽此。臣等伏查附近四川之陝西、山西、河南三省。均有冊報耗羨銀兩。九江、潯墅、龍江等關。亦有冊報稅銀。可以動撥。臣等擬於陝西耗羨內撥銀五十萬兩。山西耗羨內撥銀四十五萬兩。河南耗羨內撥銀五十五萬兩。九江關稅內撥銀五十萬兩。潯墅關稅內撥銀三十五萬兩。龍江關稅內撥銀一十五萬兩。共銀二百五十萬兩。所有附近四川省分。除撥運外。尚餘銀兩。亦各應留備本省之用。無可再撥。臣等擬於四川本省春撥冊報地丁內。就近酌撥銀五十萬兩。以足三百萬之數。臣等行令各該撫織造等。卽派委委員。迅速解往四川備用。並行令四川總督遵照辦理等因。奉旨。依議。欽此。

陝西巡撫秦承恩布政使和甯捐辦馱驢一千頭解赴川省以備運送軍儲。

五月二十二日陝西巡撫秦承恩具奏。臣前得孫士毅來信。知現在蔡木多一帶督辦烏拉。當與藩司商酌。口外烏拉一時既難就手。陝西西安同州等屬有產驢之處。若購備一千頭解往應用。較之番地馬牛自多得力。因即一面購買。一面札商孫士毅去後。茲准覆稱。口外馬匹短少。現在兼辦驢馬出口。如陝省能辦驢馬。可資應用等語。臣現在購買健驢一千頭。及鞍屨籠轡鐵掌等件。均已陸續辦齊。擬即委員分起解赴成都交收。如該省遇有應運軍儲。即可馱送出口。至辦理此項驢頭。臣與布政使和甯捐備銀兩。分委委員在於產驢各市集先行挑買。專派道府稽查驗收。當面給價。不使書役人等從中扣剋刁難。亦無抑勒科派情弊等因。

二十四日大將軍福康安攻克脅布嚕碣卡。

大將軍統兵進至密哩頂旺噶爾地方。並無平地可以割營。官兵均在石岩下露宿。深入賊境一百六十七里。至脅布嚕一帶。有賊匪砌卡屯聚。該處當路有橫河一道。水深湍急。與熱索橋形勢相似。原橋座業被賊匪拆毀。官兵在山上用礮轟擊木城。打死多人。賊匪總不敗退。拒守甚堅。大將軍參贊等於二十三日帶兵繞至橫河上游。借接枯樹搭橋。我兵奮勇直前。搶渡無如鎗聲不絕。河水急溜。木輦漂去。不能即渡。因於日暮大雨時。伴令各兵撤退。候至夜半。賊匪回寨。趕緊接縛大木。緣木過河。分爲三路。於二十四日黎明。併力壓下。盡力追勦。殺死賊三百餘名。焚毀賊寨五座。賊匪見官兵各路壓下。棄城奔逸。復被我兵邀截。殺死三百餘名。等因具奏。奉上諭。官兵自過熱索橋後。所經地方。陡巖高砌。亂石叢集。並無平地。可以割營。福康安等與所帶官兵。至於露宿。實甚勞苦。至不忍觀。其脅布嚕一帶。極爲險要。賊匪憑河阻抗。撤橋固守。福康安等復設法出奇。乘其不意。於夜雨迅速潛渡。將賊匪痛加殲戮。焚燒卡寨。快意已極。而巴圖魯侍衛官兵俱爭先用命。於峭壁懸崖。深林密箐。人跡不到之區。攀援登涉。至於衣履皆穿。手足

胼胝並未稍形退怯。用兵以來從無似此之難者。欣覽之餘。益加憐憫。官兵深入賊境。連次克捷。福康安等調度督率。悉合機宜。此時已無可諭。今賞給福康安御用小荷包一對。小荷包四箇。四喜撒指一箇。鑲嵌松石翎管一箇。海蘭察惠齡各賞給大荷包一對。小荷包二箇。四喜撒指一箇。鑲嵌松石翎管一箇。外發去四喜撒指六箇。鑲嵌松石翎管十七箇。著福康安等酌量帶兵大員內。如合襲英阿等何人最爲出力者。傳旨分賞。又鼻煙壺小刀各四十件。並著福康安等遇有帶兵出力之侍衛章京將領等酌量賞給。此次打仗兵丁均屬奮勇勞苦已極。並著各賞給一月錢糧以示獎勵。欽此。

班禪額爾德尼還札什倫布住錫。

五月二十九日駐藏大臣和琳具奏。班禪額爾德尼移駐前藏已經十月之久。其札什倫布廟宇去歲雖經賊匪滋擾。經福康安查明並未過於殘毀。均已修理完整。附近番民亦皆復業等情。奏蒙聖鑒在案。臣抵藏後。福康安曾與臣札商。現在後藏運送軍糧軍火等項。歲臻堪布一人未能統攝番衆。似應將班禪額爾德尼住錫。俾得董率辦理。臣因彼時前後藏地方尙患痘證傳染。是以未卽奏請。今月餘以來查看氣候較正。且福康安收復濟甯後。衛藏僧俗人心牢固。踴躍不鼓舞歡忻。班禪額爾德尼年紀雖幼。素爲後藏番民悅服。今正當大軍深入。應付烏拉。督軍糧餉軍火萬緊之時。如班禪額爾德尼回至札什倫布。自比歲臻堪布呼應較靈。實屬兩有裨益。查鄂輝現在宗喀一帶催辦糧餉。前藏爲東西合站總匯之地。邇來甫得疏通。源源轉運。不日續調官兵陸續到來。均需料理。臣未能遽離前藏。自應俟鄂輝轉回。方可遵旨前往濟甯。以內查催。今臣奏請將班禪額爾德尼送回後藏。如蒙俞允之時。適值鄂輝回藏。則臣可以順便帶領同往。設鄂輝尙不能遽回。自應派委委員護送。查前藏總理道倭什布人極精細明白。遇事亦有斟酌。自前藏至後藏沿途台站均係該道分轄。可否即令倭什布隨送前往。恭候命下遵行等因。奉硃批。知道了。欽此。

駐藏大臣兵部侍郎和琳奉旨賞給都統銜。

五月十九日奉旨諭前因進勦廓爾喀賊匪口外一切糧運烏拉關係緊要派令侍郎和琳馳驛前往接辦藏務和琳自行抵察木多後沿途查催運送軍火運餉等項節次奏到各摺辦理均爲妥協本日據奏於閏四月十三日到藏路經丹達以西各台站向噶布倫等切實曉諭設法勸懲令將烏拉寬爲預備將前積軍需源源運送不使再有停擱等語一切留心可嘉之至著加恩賞給都統銜並著加賞御用大荷包一對小荷包四箇玉搬指一箇以示優眷和琳此次前往西藏係朕特簡和琳未經先行奏懇朕之用和琳初不過以其人尙細心遇事奮勉是以派往實不料其如此能事朕深慶得人國家得一好大臣實自幸大功或易就也欽此

協辦大學士署四川總督孫士毅由察木多赴前藏。

五月十九日奉上諭前已有旨自察木多以東令孫士毅在彼督辦察木多以西至前後藏濟甯以內令和琳鄂輝往來督率催查設法催運但察木多至前藏一帶站遠道長不下數千餘里和琳在彼督催未免鞭長莫及難以兼顧孫士毅前此自請移駐察木多未必不因該處台站價運較難是以請往督辦現在孫士毅既駐察木多自己辦有章程竟當再往察木多以西至前藏一帶往來查察幫同和琳等督率催價庶合站軍需等項運送更可迅速欽此

六月賞給屯土兵丁銀兩。

六月初二日奉上諭據福康安等奏現在進勦賊匪所調屯土兵丁由本處起程至後藏邊界道路遙遠該兵等俱屬步行德爾格等處土兵五月十五外均可到宗喀會齊即進勦濟甯等語德爾格等土兵遠道赴勦山路崎嶇途次均係步行實爲踴躍急公不辭勞瘁殊堪軫念著加恩每名賞給銀二兩以示鼓勵欽此

參贊大臣四川總督惠齡籌辦濟甯至軍營運送糧餉

六月十二日，惠齡具奏。臣於二十六日起程迎回，查催自魯布魯至色達木一帶沿途背運糧石。經臣逐節催督，而論押運弁兵，定限到營，以濟急需。自色達木至熱索橋一帶，距邊較近，藏內運出糧石，雖較前路稍多，然不能源源接濟，推原其故，總由賊境山高路險，道里倍長，番夫背運糧石，負重行走，於中途稍爲憩息，即有就延。況大兵已經乘勢深入，愈行愈遠，節節險阻，長夫更易疲乏。若令一直背赴軍營，勢難迅速。與藏內可用牛隻長運者，情形實不相同。再賊境山徑逼窄，地氣潮溼，並無安設糧臺之處。福康安前與臣熟商，安設糧臺，原爲接替轉運。若計算程途，分爲數段，多覓人夫，按段分設，各派弁員管押遞運，方可專責成而速轉運。番夫相習勞苦，偏巖石砌之下，皆可棲身，不必在寬敞地方始行安。查濟甯以外均係賊境，福康安前派遊擊額爾亨額、都司年滿、知縣常發祥、署噶布倫貢噶爾等，在濟甯雇夫背運，並招回避賊番民受雇，其駐劄邊界之唐古忒番兵，亦酌加賞犒，令其背糧應役。茲已據額爾亨額等稟報，濟甯現有番夫二百名，內熱索橋安一百名，與唐古忒兵二百餘名，接遞背運糧石。核計人數，若分段遞運，尙屬不敷。臣仰蒙聖恩委任，不敢因奉旨專管濟甯以外糧運，區分畛域，僅在邊外株守接催。自應親往濟甯，添雇番夫，以爲分段遞運之用。臣在沿途催辦數日，業於六月初一日馳抵濟甯，除將現運軍糧，催令原雇人夫先行運送外，即督同額爾亨額等，於招回避賊番民內，並在附近濟甯各寨，雇覓人夫，分派妥幹員弁，管押運糧前往。按日給與夫價，毋庸另議口食。所有背運人夫，臣逐加確核，查濟甯爲設夫接運之首站，必須多備夫力，以備大兵前進，逐段撥移之需。濟甯應安夫三百名，魯布魯應安夫二百名，熱索橋原安夫一百名，再添夫一百名，共足二百名之數。仍飭令額爾亨額等，再於濟甯一帶，多爲招徠番民，並飛咨鄂輝、和琳，將前後藏所辦番夫，速行多爲撥赴濟甯，一俟大兵追勦前進，即由濟甯逐段移添，聯絡接運。若藏內軍火糧餉，源源送過濟甯，則濟甯以外，隨到隨行，即可達軍營，不致稍有延緩。計道員林儒、將宗喀、糧運事宜籌辦妥協，前赴濟甯。鄂輝亦當行抵宗喀接催。林儒行赴濟甯以外，鄂輝自應前赴濟甯，鄂輝查催回藏，和琳又可馳赴前來。如此梭織巡查，遞加催督，臣復嚴飭總理道府及

各合員等。按照所定章程。妥爲經理。即自濟甯起程。沿途督同巴圖魯侍衛章京分段督運。並將番夫照指定地方安設。實力查催。以期軍備充裕。迅速藏功。上紓聖慮。至火藥鉛丸弓箭等項。均關緊要。臣與軍糧一體嚴催。現亦陸續遞運。尙無遲誤等因。

大將軍公福康安參贊大臣公海蘭察由脅布嚕進攻東覺山梁並雅爾賽拉博爾東拉等處克之

大將軍自第哩浪古宗略進兵。屢次克捷。收復濟甯。攻克熱索橋。深入賊境。又由脅布嚕進攻東覺山梁。並雅爾賽拉博爾東拉等處。將賊匪營寨木城礮卡全行攻克。巴圖魯侍衛翁果爾海哲森保那丹保鄂尼保富永俱受有銜傷。奉旨將此次出力之將領等交福康安等查明具奏。另行陞賞外。福康安海蘭察俱交部議敘。翁果爾海哲森保於前次打仗得勝。已賞給副都統職銜。著加恩賞給哲森保銀一百兩。翁果爾海銀五十兩。其中鎗傷之三等侍衛那丹保鄂尼保俱陞爲二等侍衛。藍翎侍衛富永陞爲三等侍衛。其打仗陣亡之索倫佐領多爾濟四川都司伊魯爾圖及打仗陣亡之官兵俱交部照例議卹賞卹等因。欽此。又奉上諭。據福康安奏。望見東覺山頭賊寨賊營甚多。地勢險峭。高峻有橫河一道。斷難帶兵徑渡。福康安等帶兵繞行兩日至半山。臨河石卡賊匪盡出抵禦。官兵奮勇勦殺。屯兵數人奮勇先登。被刀砍傷並未稍卻。攀援繼上。將賊匪木城立時攻克。賊匪亦來邀截。經我兵殲戮殆盡。遂將賊寨賊營全行攻克等語。實快意已極。至各兵登山涉險打仗追賊晝夜辛勤。已至八日。自應暫與休息。再行前進。此次福康安等於萬難攻勦之處。竟獲全勝。此皆仰賴上天眷佑。感謝之誠。不能言喻。而福康安等肅率調度。悉合機宜。以及將弁兵丁勞苦之狀。可憐可嘉。竟不忍復視。此時亦無可再諭。除已明降諭旨將福康安海蘭察交部議敘外。著再加恩賞給福康安玉搬指一箇。御用大荷包一對。小荷包四箇。海蘭察玉搬指一箇。大荷包一對。小荷包二箇。用示優眷。並發去蜜蠟鼻煙壺九箇。小刀九把。著福康安查明帶兵出力之巴圖魯侍衛章京等分別賞給。仍擇其實在奮勉者開單具奏。候朕賞給巴圖魯名號。並予陞擢以示獎勵。其餘出力官兵交部議敘。計此旨到時。福康安等早抵陽布博穴擒渠矣。統俟大功告竣。再降諭旨。酬庸懋賞。欽此。